

ՀԱՃԸՆԻ ՀԵՐՈՍԱՄԱՐՏԸ

Հ. Ե. ՂԱԶԱՐՈՍՅԱՆ

Տավրոսյան լեռնաշղթայի հարավային հատվածում գտնվող Հաճըն քաղաքում բնակչությունը հայտնվել է Բագրատունիների թագավորության (885—1045 թթ.) կործանումից հետո, երբ «գաղթականական հոսանք մը սկսավ դեպի Կիլիկիա: Այդ միջոցին գաղթականության թիվ մըն ալ երկարեցավ դեպի Հաճըն»¹:

Թշնամական հարձակումների դեմ իրենց գոյատևման պայքարով հաճընցիները փառավոր էջեր են գրել հայ ժողովրդի պատմության մեջ: Միայն XX դ. հաճընցիները երեք անգամ ենթարկվեցին Թուրքիայի կառավարողների հայակործան գործողություններին: Արյունալի բախումների ժամանակ քաղաքը և նրա շրջակա գյուղերն ավերվեցին, զոհվեցին տասնյակ հազարավոր անմեղ հաճընցիներ:

Օսմանյան կայսրությունում դարասկզբին տեղի ունեցան խոշոր իրադարձություններ. դրանց սկիզբը 1908 թ. երիտթուրքական հեղաշրջումն էր, որի կեղծ կարգախոսներին հավատալով, գրում է կիլիկիացի հույն պատմաբան Մ. Պաղծիլօղլուն, «թուրքերը, հույները, հայերը, քրդերը և հրեաները միավորված տոնեցին այդ իրադարձությունը»²: 30-ամյա աստվածապետական, ֆեոդալական և բռնատիրական վարչակարգի կործանումը ողջունեց նաև կիլիկիահայությունը: Ամենուրեք, այդ թվում և Հաճընում, հայ ժողովուրդը «փարած էր հյուրիեթի (ազատության—Հ. Ղ.) գաղափարին և անկե կակնկալներ շատ մեծ բաներ»³:

Երիտթուրքների հաղթարշավից կարճ ժամանակ հետո, 1909 թ. ապրիլին Հաճընում ստացված հեռագրերից հայտնի է դառնում, որ ազատության, եղբայրության, արդարության այդ «մունետիկների» ձեռքով «10—15 օրվա մեջ 30.000 կիլիկյան հայեր զոհ գնացին՝ խոզոտրեն ջարդվելով»⁴: Երիտթուրքների ծրագրած ջարդերի ժամանակ ավերվում ու հիմնահատակ կործանվում են Կիլիկիայի հայաբնակ Տարսուս և Մարաշ քաղաքները, տասնյակ գյուղեր ու բնակավայրեր: Սակայն «Սսում, որը հայ եկեղեցու կաթողիկոսի աթոռանիստ քաղաքն էր, Հաճընում, Դյորթ-յուլում և այլ վայրերում հայերը հերոսական գիմարդություն ցույց տվեցին և հաջողությամբ հետ մղեցին հրոսակների հարձակումները»⁵:

Կայսրության ամբողջ տարածքի հայությանն ավելի ահավոր օրեր էին սպասում: Հեղաշրջումից յոթ տարի հետո երիտթուրքական դահիճ-մինիստրներին որոշմամբ իրականացված «հայերի ցեղասպանությունը մարդկության պատմության մեծագույն զանգվածային ոճրագործությունն էր: Այն հավերժական խարանդորոշմ էր Թուրքիայի և Մարդկության պատմության մեջ»⁶:

¹ Ս կ ր ա տ Թ ե ր զ յ ա ն, Հաճընի ութամսյա դուցազնամարտը, Բուենոս Այրես, 1956, էջ 33:

² Μίλτος Παγούλιος. Η Γενοκτονία των Ελλήνων και των Αρμενίων της Μικράς Ασίας, Αθήνα, 1988, σ. 60 (այսուհետև՝ Մ. Պաղծիլօղլուն):

³ Զ. Պ. Պողոսյան, Հաճընի ընդհանուր պատմությունը և Գոգան-դաղի հայ գյուղերը, Լոս Անջելես, 1942, էջ 567:

⁴ Նույն տեղում, էջ 568, տե՛ս նաև B. Θεόδωρος πούλος, Οι τούρκοι και εμείς. Αθήνα, 1988, σ. 93:

⁵ Մ. Պաղծիլօղլուն, նշվ. աշխ., էջ 62:

⁶ Նույն տեղում, էջ 77:

Երկրի բոլոր անկյուններից մարդկային բազմությունները, ավելի քան մեկ ու կես միլիոն հալեր՝ տարեց տղամարդիկ ու անչափահասներ, կանայք՝ կրծքի երեխաներով ու աղջիկներ ոտաբորիկ շարժվում էին դեպի արևելք։ Հալեպից Բաղդադ ճանապարհին՝ 600 կիլոմետր ձգված Դեյր-էզ Զոր անապատը լցվել էր բռնազաղթված հայերի անշնչացած մարմիններով։ Այդ արհավիրքի օրերին Հաճընի 35.000 զավակները չվերադարձան 29.000-ը՝ Քաղաքում 1919 թ. «հուլիսի սկիզբները հայության թիվը մոտավորապես 6.000-ի հասած էր»⁷։

Զարդից ու քառամյա տարագրությունից վերապրած հաճընցիները ձեռնամուխ եղան վերաշինական աշխատանքներին։ Բոլոր հաճընցիները, ասես հոգեփոխության ենթարկված, մոռանալով միջկուսակցական անիմաստ ու անհաշտ պայքարը, վճռել էին անողոր թշնամու դեմ կենաց և մահու մարտերում միասնականորեն հանդես գալ։

Երկու անգամ կոտորվելուց հետո կիլիկիահայությունը, այդ թվում և հաճընցիները, հույս ունեին Արևմուտքի երկրների, հատկապես Ֆրանսիայի օգնությամբ դիմակայել թուրքական բաշխողություններին։ Փարիզում և Լոնդոնում քաղաքական ու ռազմական շատ գործիչներ փորձում էին հայերին համոզել, որ իրենք անկեղծ բարեկամներ են և պատրաստ են նպաստել անկախ Հայաստանի ստեղծմանը։ Այդպիսի «հայասերներից» էր Կիլիկիայում Ֆրանսիական օկուպացիոն զորքերի զննպետ է. Բրենմոնը, որի հայտարարության համաձայն «այդ երկիրը (Կիլիկիան—Հ. Ղ.) սահմանված է ըլլալու հայկական հողամաս»⁸։ Թուրքիայում օկուպացիոն Ֆրանսիական զոտու քաղաքական վերահսկողությունն իրագործելու կոչված այդ զինվորականը հայերի հետ իր նամակագրություններում օգտագործում էր «Հայաստանի վարչապետ» տիտղոսային մակագրությունը։ Ի պատիվ «վարչապետի» ու նրա ներկայացրած պետության Կիլիկիայի բոլոր հայաբնակ վայրերի հասարակական շենքերի վրա ծածանվում էին Ֆրանսիական եռագույն դրոշներ, որոնք խորհրդանշում էին օկուպացիոն ռեժիմը։

Իրենց ավերված օջախները վերադարձած հաճընցիներին մտահոգում էր ֆիզիկական ունչացումից փրկվելը։ Դա մարդկային ամենատարրական իրավունքի հարց էր, հարցերի հարցը. «չէ՞ որ Դեյր-Զորը կմխար տակավին, որուն ամբողջ մեղքը մեր վզին դնել կճգնենք «քաղաքակիրթ» մարդկությունը, հանդարտ խղճով քնանալու համար ... կրնար կրկնվի...»⁹։

1920 թ. առաջին օրերին Հաճըն է գալիս զորավար Անդրանիկի զինակից Սարգիս Ծեպեճյանը։ Այդ օրերին, գրում է Հաճընի ինքնապաշտպանության Բ վաշտի հրամանատար Մեսրոպ Շիրտմյանը, «առաջնորդարան հրավիրված էինք, օրվա կացության շուրջ խորհրդակցելու՝ Սարաճյան սրբազանի նախաձեռնության տակ։ Սրբազանը երկտողով մը Ծեպեճյանին ժողովի հրավիրեց, ուրիշ քանի մը անձեր ալ կանչելով։ Ինքնապաշտպանության խորհուրդ մը կազմվեցավ սրբազանին նախագահությամբ, Միհրան Գայանի ատենապետությամբ և Սարգիս Ծեպեճյանի Զինվորական ընդհանուր հրամանատարությամբ»¹⁰։

Ռազմական ճամբար հիշեցնող քաղաքում հայտարարվում է պաշարողական վիճակ։ Զինվորական ընդհանուր հրամանատարության տրամադրության տակ են դրվում մարդկային և նյութական ռեսուրսները։ Քաղաքն անառիկ դարձնելու համար Ս. Ծեպեճյանի հրամանով, «զորակոչի են ենթարկվում 16—50 տարեկան բոլոր տղամարդիկ։ Զինված ուժերը բաժանվում են չորս վաշտերի։ Կազմվում են առաջապահ և պահեստի խմբեր, որոնք կանոնավոր մարզվում են։ Զինվորական խիստ կարգապահություն է սահման-

7 Յ. Գ. Պոլոսյան, նշվ. աշխ., էջ 613։

8 Վահան Մալեզյան, Ճամբուս վրա (Հուլաքաղ), Փարիզ, 1958, էջ 144։

9 Նոր Հաճըն, 1961, № 2, էջ 41։

10 Նոր Հաճըն, 1970, № 10, էջ 280։

վում։ Սակայն զենքի խիստ կարիք էր զգացվում։ ութ հարյուր կովոդներից միայն երեք հարյուրը իրենց անձնական զենքն ունեին»¹¹։

Պաշտպանության ուժերին մասնակցում էին նաև թուրքիայի տարրեր շրջաններից այստեղ հասած երիտասարդներ, որոնք աչքի էին ընկնում իրենց կարգապահության մարտունակությամբ։ Հաճրնցիների ճակատագիրը բաժանած ռուսացի, կեսարացի, թուրքացի, էվլերեկցի, օվաշլուգցի և շատ մյուս ռիշ հերոսներ կովեցան ու զոհվեցան հանուն հայրենիքի ու հանուն մարդկային կյանքի»¹²։

Հաճրնի լեռնային անառիկ դիրքը նրա պաշտպաններին հնարավորություն կտար արդյունավետ դիմագրավել թշնամական ուժերի անակնկալ հարձակումներին, սակայն անհրաժեշտ էր պաշտպանական ծրագիր մշակել ու միջոցներ ձեռնարկել։ Ծրագիրը, որ մշակել էր Ս. Ժեպեճյանը, նախատեսում էր ստեղծել պաշտպանության երկու գոտի, որոնցից առաջինը պետք է հակառակորդին դիմագրավեր քաղաքի սահմաններից դուրս, ընդգրկելով ռազմական ընդարձակ շրջագիծ մը, խոր ձորերով և երկնամերձ լեռներով կտրատված»¹³։ Իսկ Էրկրորդը ամրությունների մի համակարգ էր, որը ստեղծվելու էր անմիջականորեն Քաղաքին շուրջ, ծայրամասի թաղերուն առջև, այնտեղ փութով կառուցանելով պատնեշներ, փորելով խրամատներ, գետնուղիներ և ինչ-որ անհրաժեշտ էր մոտավոր թշնամու գրոհները դիմակայելու համար»¹⁴։ Պաշտպանական համակարգի ստեղծման համար առաջին հերթին պահանջվում էր նյութական ու ֆիզիկական հսկայական միջոցների հատկացում։ Սպառնացող վտանգը քաղաքացիներին ստիպեց դադարեցնել քանդված օջախների և հանրօգուտ հաստատությունների վերականգնման աշխատանքները և շրագարող լարվածությամբ իրագործել պաշտպանական գծերի ստեղծումը։

Ս. Ժեպեճյանի կանխատեսումներն անհիմն չէին։ Մարաշում 1920 թ. հունվարի 21-ից մինչև փետրվարի 11-ը տևած կոտորածի ժամանակ թուրքական յաթաղանից զոհվում և նահանջի ճանապարհին ընկնում են մոտ 12 հազար հայեր¹⁵, որից հետո թուրքական կանոնավոր բանակն ու շեփեները հետապնդում են հեռացող ֆրանսիական զորքերին ու հայերին։

Ֆրանսիական զորքերի նահանջը դեպի Կարս, Բազար ու Սիս, Էլ ավելի էր ուժեղացրել Հաճրնի սպառնացող վտանգը։ «1920 փետրվարի 22-ին Հաճրնի մեջ շրջակային հասնող լուրերը վրդովեցուցիչ էին,— գրում է Հաճրնի առաջնորդ եպիսկոպոս Պ. Սարաճյանը,— ամեն կողմ պատրաստություն կա Հաճրնի վրա հարձակելու և միայն ձյունահալին կսպասվի»¹⁶։

1920 թ. փետրվարին Կիլիկիայում ֆրանսիական հրամանատար գեդապետ է. Բրեմոնը Հաճրնի քաղաքապետ է նշանակում իրավաբան, հնչակյան գործիչ Լ. Չալյանին։ «Շատ խառնակ ժամանակաշրջան էր,— գրում է Լ. Չալյանի կրտսեր որդի Վ. Չալյանը։— Մեր ընտանիքը, մեր հարազատները հորս Հաճրն գնալու դեմ էին։ Այդ ժամանակ մենք գտնվում էինք Ադանայում։ Հայրս անդրդվելի մնալով գնաց, պատճառաբանելով, որ Հաճրնում իր ներկայությունն անհրաժեշտ է»¹⁷։ Հայրենի հողի ու նրա զավակների փրկության մեծ նվիրյալը ճամփա է ընկնում դեպի իր ծննդավայրը, թեև գիտեր, թե ինչպիսի վտանգներով էր լի իր առաքելությունը։ «Չալյան ոչ մի կասկած ուներ,

¹¹ Ռ. Գ. Սահակյան, Թուրք-ֆրանսիական հարաբերությունները և Կիլիկիան 1919—1921 թթ., Երևան, 1970, էջ 168։

¹² Նոր Հաճրն, 1961, № 2, էջ 41։

¹³ Նույն տեղում, 1970, № 10, էջ 280։

¹⁴ Նույն տեղում։

¹⁵ Ռ. Գ. Սահակյան, նշվ. աշխ., էջ 162։

¹⁶ Մաշտոցի անվան Մատենադարան, Արշակ Ալպոյաճյանի արխիվ, թղթ. 14, վավ. 29, ք. 2։

¹⁷ Տե՛ս ՀՀ ԳԱ սփյուռքահայ համայնքների պատմության ու մշակութի բաժնի գրադարանի արխիվ, թղթ. 3, վավ. 1, ք. 2։

որ այդ պաշտոնն ստանձնելով իր մահվան վճիռն ստորագրած. պիտի ըլլար Հակառակ անոր՝ ընդունեց առաջարկը և մեկնեցավ իր պաշտոնատեղին, իր հետ տանելով 1.200 հրացան, 125.000 փամփուշտներով, մի քանի ձեռնառումբեր և 300 տոննա ցորեն, մաս մըն ալ առողջապահական պիտույքներ¹⁸:

Ուսումնասիրելով Մարաշի և այլ վայրերի պաշտպանական կռիվների փորձը, Կ. Չալյանը գալիս է այն համոզման, որ իր համաքաղաքացիները կանգնել են մեծ երկրնորանքի առջև՝ ընդունել մարտը կամ նահանջել: Նա գտնոգմ էր, որ նենգ հակառակորդի զորքերի հարձակումները պետք է դիմագրավել կազմ ու պատրաստ: Ուստի Հաճըն ժամանելու առաջին իսկ օրերից նրա եռուն ու բազմակողմանի գործունեության առանցքային հարցը դարձավ քաղաքի ինքնապաշտպանության փրկարար գործն ամուր հիմքերի վրա դնելը: Հաճըն հասնելու հաջորդ օրը՝ 1920 թ. փետրվարի 20-ին, նա Բրեմոնին հեռագրով տեղեկացնում է. «Կաղային (գավառակի—Հ. Ղ.) ներքին ու արտաքին կացությունը առայժմ հանդարտ է, որուն առաջին օգնականը բնությունն է, որ ամեն կողմ ձյունե առժամանակյա պարիսպով մը շրջապատած է»¹⁹: Մարտն ընդունելու որոշումը Կ. Չալյանն առնչում էր Ֆրանսիայի օժանդակության հետ, այն երկրի, որն ստանձնել էր Կիլիկիայի հողերի պաշտպանությունը և որի ներկայացուցիչները «գրական և հսկայական օգնություն ընելու խոստումներ ըրած և որոշ հավաստիքներ տված են»²⁰: Համոզված լինելով, որ Կիլիկիայի հայության ճակատագիրն անխզելիորեն կապված է Ֆրանսիայի հետ, նա կարծում էր, որ Ֆրանսիայի շահերի պաշտպանությունն իր համար ունի այնպիսի իմաստ ու նշանակություն, ինչպիսին էր ամբողջ Կիլիկիայի պաշտպանությունն ու անկախությունը: Կ. Չալյանը գնդապետ Բրեմոնին հավաստիացնում է. «Ֆրանսական դրոշմն փառքն ու պատիվը բարձր պահելը կյանքիս գնովը սրբազան պարտականություն մը կնկատեմ»²¹:

Քաղաքում կարգ ու կանոնի հաստատման համար Կ. Չալյանն իր կառավարման առաջին օրերին կազմակերպում է «ոստիկանական տեղամաս», որը բաղկացած էր 100 մարդուց, ինչպես նաև բանակային 4 միավորում՝ յուրաքանչյուրը բաղկացած 100-ական կամավորներից, որոնք անմիջապես ձեռնամուխ եղան զորավարությունների և քաղաքի մատույցների ամրացմանը²²:

Հեռատես գործին ի մի բերեց նաև քաղաքի հայ ազգաբնակչությանը, որը բացի հայ առաքելական եկեղեցուց, պատկանում էր նաև կաթոլիկական ու ավետարանական հարանվանություններին: Դեռևս մինչև առաջին համաշխարհային պատերազմը քաղաքի 35 հազար բնակչությունից «23.000-ը հայ-լուսավորչական, 12000-ը հայ-բողոքական, 300-ը հայ-կաթոլիկ և 300-ի չափ ալ իսլամ»²³ էին: Ստեղծվեց համաքաղաքային միասնություն, որը պիտի դիմագրավեր քեմալական կանոնավոր զինված ուժերի և շեթենների հարձակումներին:

Կ. Չալյանին առաջին հերթին մտահոգում էր նաև Հաճընի ու գավառի թուրք ազգաբնակչության հետ հարաբերությունների բարելավման հարցը, ուստի «խորապես տեղյակ թուրք հոգեբանության, երկու ազգերու միջև բացված խրամատը ավելի շտրպանելու առաջադրությամբ, Հաճընի գավառային խաղաղությունը պահպանելու միակ միջոց ընտրեց՝ թուրքերը սիրաշահելու քաղաքականությունը»²⁴, և ազատ արձակեց քաղաքում ներկայված

18 Տ ի գ Ր ա ն Պ ո յ ա ճ յ ա ն, Հայկական լեզուներ, Ութրթաուն, 1965, էջ 299:

19 Յ. Պ. Պ ո ղ ո ս յ ա ն, Նշվ. աշխ., էջ 632—633:

20 Նոր Հաճըն, 1943, № 8—9, էջ 117:

21 Ս. Թ ե Ր Ղ յ ա ն, Նշվ. աշխ., էջ 227:

22 Մ. Պ ա ղ ժ ի լ օ Ղ լ ու, Նշվ. աշխ., էջ 118:

23 Ս. Թ ե Ր Ղ յ ա ն, Նշվ. աշխ., էջ 34:

24 Նույն տեղում, էջ 224:

300 թուրք ոճրագործներին: Բացի այդ, Կ. Չալյանի որդու վկայությամբ, նրա հայրը «շատ բան էր անում, որ հայերի և թուրքերի միջև նորմալ վիճակ ստեղծի, և իր կյանքը վտանգելով գնում էր Հաճընի շրջակայքում գտնվող թուրքական գյուղերը, բանակցում և համոզում, որ փոխադարձ առևտուր անեն: Մեծ դժվարություններով հաջողված առևտուրը միայն որոշ ժամանակ շարունակվում էր»²⁵:

Հակառակորդի վերահաս հարձակումներն արդյունավետ դիմագրավելու համար անհրաժեշտ էր հետախուզական տեղեկություններ հավաքել քեմալական զորքերի ու շեթենների տեղաշարժերի և պլանների մասին: Ուստի Կ. Չալյանը Բրեմոնից խնդրում է, որ իր տրամադրության տակ դրվի «երկու հազարեն մինչև երեք հազար (հավանաբար ֆրանսիական ֆրանկ—Հ. Ղ.)»²⁶: Դեռևս հետախուզական ծառայությունը չէր ստեղծվել, երբ Կ. Չալյանին հայտնի դարձավ, որ «քեմալականներ հաջողած էին ի մի բերել չորս հազար ավելի անկանոն զինվորներ և երկու հազար ձիավորներ, որոնք դիրք բռնեցին Անդերոն լեռան կողքին»²⁷: Հաճընի ազգաբնակչությունը միտինգներում տագնապով հարց էր տալիս՝ ի՞նչ է լինելու վաղը, ինչպե՞ս է լուծվելու իր մոայլ ու անորոշ վիճակը, ինչ են մտածում «հայասեր» ֆրանսիացիները: Այդ հարցադրումները մնում էին առանց պատասխանի: Քաղաքից ուղարկված տագնապալի հեռագրերի պատասխանը չէր ստացվում կամ դրանց «նույնիսկ արհամարհումներով կպատասխանվեին անոնց կողմից, որոնք խառնակչական մանածը ներկելու մեջ խտրություն չդրին հայու և թուրքի միջև, և իրենց արյունոտ նպատակներին հասնելու համար ստեղծեցին կանխամտածված քառս մը»²⁸:

Հրդեհված ու ավերված քաղաքում պահպանված միակ կառույցը՝ Սահակ-Մեսրոպյան հոյակապ վարժարանի շենքը, վեր էր ածվել համաքաղաքային վարչական-ռազմական և մշակութային կենտրոնի: Շենքի առաջին հարկում գործում էր եկեղեցին, իսկ հինգերորդ հարկում առաջնորդարանն էր: Այստեղ փետրվարի 22-ին լրիվ կազմով նիստ է գումարում Ինքնապաշտպանության խորհուրդը: «Հոն ներկա էր նաև Հաճընի նոր տեղակալը՝ տիար Կարապետ Չալյան: Ժողովականները տխուր էին, ստույգ բայց չարագուշակ լուրեր առած էին: Ժողովը երկար խորհրդակցութենի վերջ սա եզրակացություն հեկավ, որ ազդեցիկ անձնավորություն մը իբրև պատվիրակ երթա Ադանա»²⁹ գնդապետ Բրեմոնի մոտ:

Ինքնապաշտպանության խորհրդի գրեթե ամբողջ կազմը մեծ հույսեր էր տածում ֆրանսիական իշխանությունների վրա, անվերապահորեն հավատում էր, որ «ասպետական» ֆրանսիան վտանգի մեջ մեծակ չի թողնի քաղաքի պաշտպաններին: Սարաճյան սրբազանը մեկն էր այն գործիչներից, որը չէր վստահում ֆրանսիական խոստումներին: Ահա թե ինչու, նա հուզված ու վրդովված իր համաքաղաքացիներին քաջալերում և հորդորում է «հանդարտ ու պաղարյուն ըլլալ և հույսը դնել իրենց անընկճելի կորովին, իրենց ուժին և իրենց անառիկ լեռներուն վրա»³⁰: Ժողովը Սարաճյանին առաջարկում է ստանձնել այդ առաքելությունը և ֆրանսիական ռազմական ղեկավարությունը տեղյակ պահել քաղաքի վրա կախված վտանգի, նրա ներքին վիճակի մասին, հայցել Բրեմոնի ռազմաքաղաքական աջակցությունը, հայ կամավորներ հավաքագրել և նրանց ուղարկել Հաճընի պաշտպանությանը մասնակցելու:

25 ՀՀ ԳԱ Եփրուսեացի համայնքների պատմության և մշակույթի բաժնի գրադարանի արխիվ, Բղթ. 3, վավ. 1, Բ. 2:

26 Յ. Պ. Պոդոյան, նշվ. աշխ., էջ 633:

27 Տ. Պոյաճյան, նշվ. աշխ., էջ 300:

28 Ս. Թերոյան, նշվ. աշխ., էջ 223:

29 Մաշտոցի անվան Մատենադարան, Արշակ Ալպոյաճյանի արխիվ, Բղթ. 14, վավ. 29, Բ. 1—2:

30 Նույն տեղում, Բ. 1:

համար: Սակայն Սարաճյանը տարբեր պատրվակներով չի ուզում հեռանալ քաղաքից, որովհետև «Ֆրանսիացիներն որևէ օգուտ չէր հուսար. Սիսի ֆրանսական կառավարիչը, պ. Թայարդա, խոստացած էր ֆրանսացի սպա մը ղրկել Հաճըն, միշտ հոն մնալու համար, նույնիսկ այդ խոստումը կատարած չէր»³¹: Սարաճյանն այս և այլ փաստերով փորձում է ժողովականներին համոզել, որ արտաքին ուժերի օգնության վրա հույս դնելը զուր է, բայց նրանք անդրդվելի են մնում: Որոշվում է պատվիրակություն կազմել, որի մեջ Սարաճյանից բացի մտնում են բողոքական համայնքի ղեկավար Հարություն Նաչատուրյանը և Սահակ-Մեսրոպյան ազգային վարժարանի տնօրեն Շմավոն Փոստոյանը: Պատվիրակության առաքելությունը հետևյալն էր.

«Առաջին. Աղանա երթալ, դիմել ֆրանսական իշխանության ներկայացուցիչ գնդապետ Բրեմոնին և հանուն Հաճընի խնդրել զինվորական և նյութական օգնություն, այսինքն զինվոր, զենք, ռազմամթերք և դրամ:

Երկրորդ. Ի հարկին աղանայաբնակ հաճընցիներն և այլ փափաքողներն կամավորական խումբեր կազմել և ղրկել Հաճըն:

Երրորդ. Այս ըլլալիք դիմումներուն հաջողության կամ անհաջողության պարագային հեռագրով հրահանգ տալ Հաճընին՝ դիմադրելու կամ նահանջելու»³²:

Հաճընի հերոսամարտի անմիջական մասնակից Ս. Թերզյանը գրում է, որ Սարաճյանի գլխավորած պատվիրակությանը հանձնարարված էր փակ ծրարով ֆրանսիական ռազմական հրամանատարությանը ներկայացնել ինքնապաշտպանության համար անհրաժեշտ հետևյալ օգնությունը. «քսան հազար ռուբլի, հազար անձ իրենց զենքերով, երկու հազար բատանիա (ծածկոց—Հ. Ղ.), 250 հազար փամփուշտ, 12 հեռաձայն, 12 հեռադիտակ, 150 երկաթյա թի, 200 բրիչ, հազար կիլո շաքար, 90 կիլո պողպատ, վեց գնդացի, 1000-ական կիլո ծխախոտ և աղ»³³:

Ճանապարհորդության երկրորդ օրը պատվիրակությունը Հորթում կռված բացատում ենթարկվում է չեթենների հարձակմանը և փետրվարի 23-ի դիշերը հասնում Սիսի Քաղաքի ֆրանսիական պարետ կապիտան Թայարդան «քաղաքի մեջի իր տունը լքած ու վանք (Սսո մայրավանք—Հ. Ղ.) փոխադրված էր ապահով ըլլալու համար»³⁴: Այնտեղ ընդունելով պատվիրակությանը, Թայարդան լսում է Հաճընի ճգնաժամային վիճակի մասին հաղորդումը, գրառումներ է կատարում քաղաքի համար պահանջվող օգնության մասին, բայց հրաժարվում է Սսից Հաճըն զինվորական ուժեր ու իր միջոցներով ռազմանյութ ուղարկել: Նա ասում է. «Մի՛ սպասեք, որ կրնանք զինվոր տրամադրել Հաճընի պաշտպանության կամ զենքի փոխադրության համար»³⁵ և Սարաճյանին խորհուրդ է տալիս զուր տեղը Աղանա չգնալ: Թայարդայի հետ զրույցը հիասթափեցնում է պատվիրակության անդամներին: Նրանք ման օգնություն նրանք ուղղակի Աղանայից էլ չէին կարող ակնկալել, մանավանդ որ Դաշտային Կիլիկիան ամբողջովին չեթեններով լեցուն էր, ոչ միայն ճամփորդները կկողոպտվեին, այլ նաև այն թուրք գյուղերը, որ չեթեններուն չէին միանար, կթալանվեին, նույնիսկ կհրկիզվեին»³⁶:

Բոլոր կողմերից քեմալական ուժերով շրջապատված Հաճընը 1920 թ. մարտի 15-ին ամբողջովին կտրվել էր արտաքին աշխարհից: Քաղաքի քաջարի պաշտպանները պատրաստվում էին դիմադրավելու հակառակորդի գերազանցող ուժերին: 1920 թ. ապրիլի 1-ի վաղ առավոտյան քեմալական զոր-

31 Նույն տեղում, թ. 2—3:

32 Նույն տեղում, թ. 3, տե՛ս նաև Ռ. Գ. Սահակյան, նշվ. աշխ., էջ 169:

33 Ս. Թերզյան, նշվ. աշխ., էջ 229:

34 Մաշտոցի անվան Մատենադարան, Արշակ Ալպոյաճյանի արխիվ, Թղթ. 14, վամ. 29, թ. 10:

35 Նույն տեղում:

36 Նույն տեղում, տե՛ս նաև Ռ. Գ. Սահակյան, նշվ. աշխ., էջ 169:

քը թնդանութային հարվածների աջակցությամբ հարձակվում է քաղաքից հե-
ռու, ձյունապատ գագաթներում դիրքավորված հայ աշխարհազորայինների
փոքրաթիվ խմբերի վրա: Փոխհրաձգության ժամանակ լեռնային դիրքերը
ձեռքից-ձեռք են անցնում: Այդ մարտերի ղեկավար՝ Արևելյան ճակատի հրա-
մանատար Մ. Շխրտմյանն իր օրագրում գրել է. «Թշնամին միշտ կը առա-
ջանա, և մենք դեպի քաղաք կքաշվինք: Գերմանական փամփուշտնիս լմնցավ
լեռնային բախումներու ընթացքին. կամա-ակամա որոշվեցավ բոլորովին
քաղաք քաշվիլ: Զեպեճին հակառակեցավ՝ քաղաքեն դիմադրել անկարելի է
ըսելով»³⁷:

Անհավասար մարտերից հետո հաճընցիների սակավաթիվ ուժերը տեղա-
փոխվեցին դիմադրության երկրորդ գոտի, որը, ինչպես նշեցինք, ավելի հու-
սալիորեն պետք է ապահովեր քաղաքացիների պաշտպանության գործը:
Թշնամին, որ գրեթե կրկակոխ հետևած էր մեր նահանջող ուժերուն, հի-
մա սեղմորեն օղակած քաղաքը՝ օր ու գիշեր կրակ կմաղեր քաղաքին վրա,
մոտակա բարձունքներեն, ռազմական կարևոր կետեր կրոներ, դիրքեր կամ-
րացներ և շոշափումի հարձակումներ կըներ»³⁸: Լեռնային դիրքերը թողած
քաղաքի պաշտպան մարտիկները, թեև համոզված էին, որ իրենց չի հաջող-
վի վերջնական պարտության մատնել կամ վերջնականապես հեռացնել ան-
հաշիվ և լավ զինված թուրքական բաշխողականներին, արհամարհելով նրանց
գնդակները, նոր դիրքեր էին ստեղծում, «նախընտրելով ոտքի վրա պատե-
րազմի դաշտին պատվավոր մահը, քան ծնկալք ստորուկի կյանքը»³⁹:

Հակառակորդը հրետանային ուժակոծություններով քայլ առ քայլ ավե-
րում էր քաղաքը: Ամենուրեք լսվում էին «բարբարոս բանակին «իլերի»
(առաջ-Հ. Ղ.) հնչող փողին ձայնը, «ալլա՛հ, ալլա՛հ» պոռագող հազարա-
վոր չեթենների խլացուցիչ աղմուկը: Ապրիլի 6-ին հայ մարտիկները թշնա-
մուն հարկադրեցին նահանջել»⁴⁰:

Առաջին հարձակման ձախողումից հետո թուրքական ուժերի նպատա-
կակետերից է դառնում քաղաքի արևմտյան լեռնալանջին գտնվող «Ս. Հա-
կոբի վանքը՝ ամրակուռ պատնեշով բոլորված»⁴¹: Հաճընի հերոսամարտի
օրերին վանքը զինավարժությունների կենտրոնի էր վերածվել: Մինչև իսկ
քաղաքի աշակերտությունը «կերթար հոն, վերին կարգերով, ուսուցչական
ամբողջ կազմով, մարզվելու՝ վանքին մոտ գտնվող Բարեգործականի որբե-
րուն հետ»⁴², կրոնական այդ կենտրոնում տեղավորվել էին նաև տնազուրկ-
ներ:

Ապրիլի 12-ին Ս. Հակոբա վանքը ենթարկվում է հրետանային գնդակո-
ծության: Վանքը պաշտպանողների մեծ մասը Հայկական Բարեգործական
Ընդհանուր Միության որբանոցի սաներն էին՝ իրենց ուսուցիչների գլխա-
վորությամբ: Գիշերային ժամերին հակառակորդին հաջողվում է գրավել դի-
մադրության այդ կենտրոնը: Այդ աննշան, բայց առաջին հաջողությունը նըշ-
վում է թուրքերի գոհաբանական աղոթքներով ու խրախճանքով: Ինչ վերա-
բերում է հաճընցիներին, ապա նրանք առաջին անգամ զգում են, որ հայրե-
նի քաղաքի ու նրա ազգաբնակչության պաշտպանությունն ու վերահսկումն
իրենց ուժերից վեր է: Ընդամենը 300 մարտիկից բաղկացած աշխարհազորը
չէր կարող իրագործել տարածված քաղաքի ամբողջական պաշտպանությունը:
Պաշտպանական կռիվների առաջին օրերից իրենց «հայրենասիրությամբ,
փորձառությամբ, ռազմական տաղանդով, աննկուն կամքով ու հարգանք պար-
տադրող քաջությամբ»⁴³ աչքի ընկան ընդհանուր հրամանատար Ս. Զեպեճ-

37 Նոր Հաճըն, 1961, № 2, էջ 39:

38 Նոր Հաճըն, 1970, № 10, էջ 282:

39 Նույն տեղում, էջ 288:

40 Ս. Թ եր գ յ ա ն, նշվ. աշխ., էջ 275:

41 Վ. Մ. Ք յ ու թ չ յ ա ն, Հայկական Կիլիկիա, Նյու Յորք, 1919, էջ 302:

42 Նոր Հաճըն, 1961, № 2, էջ 41:

43 Ս. Թ եր գ յ ա ն, նշվ. աշխ., էջ 275:

յանը և կառավարիչ Կ. Զալյանը, Բ վաշտի հրամանատար Մ. Շիրտմյանը, քաջասիրտ հերոսներ Ա. Սալյանը, Զ. Թորոսյանը և շատ ուրիշներ: Բոլորը «նույնանման փափախներ ունեին, յաթաղան բեղեր, մեջքերնուն՝ ատրճանակ: Միջահասակ, լայնակազմ այն մեկը «Ճեպեճին» է, հեռադիտակը՝ շերկեսկայի կուրծքն ի վար կախ: Կովկասյան հով մը բոլորին ալ վրան»⁴⁴:

Ս. Ճեպեճյանը հմտորեն ղեկավարում էր մարտերը և անձնական խիզախության օրինակ ծառայում: Նա «ռուսական ճերմակ զալփախ գդակ մը կգործածեր» . (հակառակորդները—Հ. Ղ.) այն կարծիքը կդրոյացնեն, թե Հաճընի մեջ ռուսահայ ռազմագետներ կան»⁴⁵, որոնք գլխավորում են դիմադրական պայքարը և խնդիր են դնում առաջին հերթին նրա և մյուս «ռուսահայների» գերեզմանները: Այդպիսով քեմալական ուժերը մտադրվել էին գլխատել հայ մարտիկներին, որոնք հիմնականում ռազմական գիտելիքներից զուրկ պատանիներ ու երիտասարդներ էին և մարտական հմտություններ էին ձեռք բերում կռիվների ժամանակ: Նրանց ղինավարժական գիտելիքներ էին ուսուցանում ռուսական և թուրքական բանակում ծառայած զինվորականները: Քաղաքի պաշտպան ուժերի մարտունակությունը բխում էր հիմնականում անձնական խիզախությունից: Կիլիկիա թաղամասի մարտիկներից մեկը՝ Մ. Քելյանը այդ մասին գրում է. «Երբ լեռներեն նահանջելով Հաճընի շուրջ դիրքավորվեցանք, մենք՝ երիտասարդներս, տարրական գաղափար չունեինք ղին-օրենքի և պատերազմական գործողության մասին»⁴⁶:

Ապրիլի երկրորդ կեսին կովող կողմերը տեղական բնույթի գործողություններ էին կատարում և սահմանափակվում միմյանց դիրքերը հետախուզելով: Հաճընահայերը, անկախ տարիքից ու սեռից, գիշերային ժամերին լծվել էին լարված աշխատանքի՝ հողով պարկեր էին լցնում, խրամատներ փորում, պատեր էին հյուսում, ստորերկրյա գաղտնանցքեր պատրաստում: Ապրիլի 30-ին թուրքական հրանոթներն սկսում են ռմբակոծել քաղաքի Կիլիկիա թաղամասը: Հայերի ամրացված դիրքերի վրա թափվում է նաև գնդացիների անընդմեջ կրակոցը: Քանդվում են հին, ինչպես նաև վերականգնված տները, բայց մարտերը չեն դադարում: Հակառակորդի կրակոցները շարունակվում են նաև գիշերային ժամերին:

Թշնամական հարձակումը դիմադրավելիս մարտիկներին ոգեշնչել են Զեյթունի հերոսական պաշտպանների և հայ ժողովրդի ազգային-ազատագրական պայքարի առասպելական հերոս զորավար Անդրանիկի սխրագործությունները: Մարտի մասնակից Վ. Եգեկիելյանը գրում է, որ հերթական դադարի ժամանակ ինքնապաշտպանության խորհրդի անդամ «Միհրան Գայան սկսավ պատմել Զեյթունի պատերազմի մասին՝ մեզ սիրտ տալու համար, իսկ կամավոր Արշակ՝ Անդրանիկ փաշայի քաջագործությունները»⁴⁷:

Մի պահ թվում էր, թե պաշտպանները, որոնք տակտիկական նկատառումներով և ռազմաանյութի խնայողության նպատակով վճռել էին «պարապ փամփուշտ չնետել և ձեռքի ռումբերը տեղին և ժամանակին գործածել»⁴⁸, լռել են առմիշտ: Մթությունից օգտվելով, 200-ի մոտ թուրքական զինվորներ, որոնց հետևում էին հազարավոր չեթեններ, «թիթեղով քարյուղ առած տունները հրդեհելու կուգան, բայց հազիվ թե դիրքերեն դուրս կելեն՝ անդիի աշխարհը կերթան: Երբ մութը կոխեց, թուրքերը, լրացուցին իրենց անպատիվ պարտության նահանջը. քաղվեցան հավաքելով իրենց գահրիմաններուն (հերոսների—Հ. Ղ.) դիակները»⁴⁹:

44 Նոր Հաճըն, 1961, № 2, էջ 41:

45 Ս. Թեբրեյան, նշվ. աշխ., էջ 273:

46 Նույն տեղում, էջ 309:

47 Նոր Հաճըն, 1961, № 2, էջ 40:

48 Նույն տեղում:

49 Նույն տեղում, էջ 41:

Հայկական դիրքերից հաղթական «հուռաները» տարածվում են քաղաքում: Կիլիկիա թաղամասի վրա թուրքական մեծ հարձակման անփառունակ վախճանը ոգևորում է հաճընցիներին: Լաց ու ողբին փոխարինում է երգն ու ցնծությունը: Մարդիկ ողջագործվում են և երգելով թափվում մոտակա բանջարանոցները՝ սնունդ հայթայթելու:

Ամենուրեք հնչում են ավանդական զուռնան ու թմբուկը, ռազմական երգերը: Վերջինների մեջ ամենից շատ տարածվածը՝ «Հառաջ ընթանանքը», նրանք երգում են ռուսական «Անվախ ընկեր» հեղափոխական երգի հղանակով և հետևյալ բառերով:

Հառաջ ընթանանք եղբայրներ,
Մարտի հրավեր կարգալուծ,
Հայրենյաց ազատությունը
Գնենք մեր սուրբ արյունով:

Բավ է, որքան տառապեցանք,
Բավ է, որքան մենք լացինք,
Այսուհետև մարտի դաշտում
Կռիվ տալով պիտ' մեռնինք⁵⁰:

Պարտությունն անդրադառնում է թուրքական կանոնավոր զորքերի ու չեթենների մարտունակության վրա: Նրանց հրամանատար Կողան օղլու Դուլանը, որն իր նախնական հաջողություններից հետո վստահությամբ էր գործում, հետևյալ հեռագիրն է ուղարկում Մ. Քեմալին. «Մեր հարձակումներն ապարդյուն անցան: Հաճընը զենքով գրավել անկարելի է: Պիտի սպասեմ, որ անոթութենն ու ժառապառ անձնատուր ըլլան: Արդեն քանի մը ամսվա բավելիք ուտելիք ունին»⁵¹: Պաշարող ասկյարները սովի վրա հույս դնելով հանդերձ, չէին հրաժարվում հերոսական քաղաքը զենքով նվաճելու իրենց փորձերից: Նրանք հույս ունեին, որ Մարաշի և նրա տասնյակ հայաբնակ գյուղերի ազդարանակչությունը ոչնչացնելուց հետո Հաճընի գրավումն իրենց համար դժվար չէր լինելու: Ուստի երկար ժամանակ զբաղվում են ուժերի վերադասավորումով և դիրքերի ամրապնդումով:

Մայիսյան օրերին համեմատաբար փոքրածավալ մարտեր են տեղի ունենում: Քաղաքի հյուսիսային թաղամասում, որտեղ հիմնականում ծավալվել էին կռիվները, թուրքերը մայիսի 10-ին մեծ կորուստների գնով գրավում են քաղաքի սահմանագծից դուրս գտնվող մի քանի հայապատկան տներ: Դրսից օգնության բացակայությունը և հակառակորդի զինվածությունը, դիրքային ու քանակական առավելությունը, մանավանդ սովը բազմապատկում են քաղաքի պաշտպանների մտահոգությունը նույնիսկ այն ժամանակ, երբ նրանք զգալի հարվածներ էին իջեցնում անընդհատ ավելացող քեմալական ուժերին և իրենց զենքը համալրում նահանջող հակառակորդից գրավվածով:

Բոլոր կողմերից մեկուսացված ու պաշարված հաճընցիները դեռևս հույս ունեին, որ Կիլիկիայում ֆրանսիական օկուպացիոն ուժերն արագ ու արդյունավետ աջակցություն պիտի ցույց տան իրենց: 1920 թ. մայիսի 28-ին՝ Հայաստանի Հանրապետության հռչակման երկրորդ տարեդարձի օրը նրանք և 10 օրվա փամփուռ տներն: Եթե տասը օր ալ ուշանանք, փչացումը անխուսափելի է: Վաղը՝ պատմությունը ճիշտապես պիտի անվանե ձեզի»⁵²: Սակայն ֆրանսիացիները երկու օր հետո քեմալականների հետ կնքեցին «1920 թ. մայիսի 30-ի զինադադարը, որի համաձայն ֆրանսիական զորքերը լքեցին

⁵⁰ Այս երգը լսել եմ Հաճընում ծնված իմ վաղամեռիկ ընկեր Կիրակոս Ռեզյանից:

⁵¹ Մ. Քեմալ ան, նշվ., էջ 316:

⁵² Նույն տեղում, էջ 326:

Միսր և նահանջեցին Ադանա՝ իրենց հետ տանելով քաղաքի հայ ազգաբնակչությունը և անշափ դժվարացնելով Հաճընին օգնություն փութացող հայ կամավորների ջանքերը»⁵³։ Հերոս հաճընցիները, այսպիսով, անելանելի վիճակի մեջ ընկան։

Ադանայում գտնվող Ամբողջական Հայաստանի պատվիրակ և Ազգային պատվիրակության ներկայացուցիչ Մ. Տամատյանը հուսադրական հեռագրեր էր ուղարկում Հաճընի պաշտպաններին և կոչ անում. «Կովեցե՛ք քաջեր, օրական 200 հոգի ճամփա կելլե դեպի Միս՝ մեկնելու համար Հաճըն»⁵⁴։

Հաճընում պաշարված ժողովուրդը ևս թի վիճակի չէր ըմբռնելու Կիլիկիո մեջ կիրակվող քաղաքական դիվային մեքենայությանց հակահայ իմաստը։ Հուսադրվեցավ Ադանային եղած անհիմն օգնության խոստումներուն վրա։ Հուսախաբ եղավ։ Ֆրանսիայի շահամուղ դիվանագիտության նժարը անգամ մը ևս ծոեցավ դարավոր թշնամիին կողմը, ընդդեմ հայ ժողովուրդին, ընդդեմ հայկական Կիլիկիո»⁵⁵, ուստի նրանք չհասկացան, դեռևս Հաճընի ճակատամարտից մեկ շաբաթ առաջ՝ մարտի 9-ին, Մ. Տամատյանին գնդապետ է. Բրեմոնի ուղարկած նամակի հստակ բովանդակությունը, որտեղ ասված էր. «Ներկայիս ան (Ֆրանսիական հրամանատարությունը—Հ. Ղ.) զորք պիտի շրջվե Հաճըն, ան չի կրնար ընել զայգ հակառակ իր փափաքին և չկրնար ալ հանձնարարություն ստանձնել հետագայի համար»⁵⁶։

Կ. Չալյանը, անտարակույս, չէր իմացել, որ ֆրանսիացիներն օժանդակ ուժեր ուղարկելուց հրաժարվել էին, իսկ հայերը Սսում հարկադրաբար կազմակերպել էին հայկական ուժեր, որոնք բազմիցս անհաջող փորձեր էին արել պաշարված Հաճընին օգնելու համար։ Այդ ուժերը Հաճընի ճանապարհին իրենց վերջին փորձն անելիս քեմալականների սարքած ծուղակն ընկնելով համարյա ամբողջովին ոչնչացել էին։ «Արշավախումբը մատնված էր։ Մատնին էր Սսի Ֆրանս. քաղաքական կառավարիչ Թայարդան»⁵⁷։

Արյունահեղ կռիվների հետևանքով ստեղծված ծանր պայմաններում իր պատասխանատվությունը գիտակցելով, Կ. Չալյանը հավաքում է վաշտերի հրամանատարներին, ինչպես նաև քաղաքի երեւելիներին և առաջարկում է ամեն գնով, առանց հապաղելու նահանջել դեպի Միս։ Հեռատես գործիչը նահանջը համարում է փրկության միակ ելքը։ «Ծեպեճին զինվորականներով տեղակալին համամիտ կգտնվի, ժողովականներն մեծ մասը (աղաներ)՝ հակառակ կարտահայտվի»⁵⁸։ Կ. Չալյանը փորձում է երեւելիներին համոզել, որ ամբողջական կործանումն անխուսափելի է, և, որպեսզի հակառակորդը նահանջող հաճընցիների վրա չհարձակվի, անհրաժեշտ է գտնում, որ քաղաքում գտնվող «թուրքերն ալ իբրև պատանդ միասին տանինք մինչև պետք եղած տեղերը։ Հիմա կատարյալ համոզում գոյացուցի, որ ֆրանսական իշխանությունը Հաճըն մահվան դատապարտեր է»⁵⁹։

Հաճընի հերոսամարտի այդ ամենածառն օրերին Պետրոս եպիսկոպոս Սարաճյանը Կիպրոսից դիմում է համաշխարհային հասարակայնությանը և կոչ անում օգնել օրհասական օրեր ապրող իր համաքաղաքացիներին։ ԱՄՆ-ի, Անգլիայի և Ֆրանսիայի արտաքին գործերի մինիստրություններին հղած հեռագրերում հայ կրոնական գործիչը դատապարտում է արևմտյան տերությունների անտարբերությունը և հարց է տալիս. «Հանդիսավորապես խոստացած չէի՞ք, որ ազգերու իրավունքը պիտի պաշտպանվի. հակառակ այդ

53 Ռ. Գ. Սահակյան, նշվ. աշխ., էջ 181։

54 Մ. Թերզյան, նշվ. աշխ., էջ 434։

55 Նոր Հաճըն, 1961, № 2, էջ 35—36։

56 Պայքար, 31. XII. 1951։

57 Մ. Թերզյան, նշվ. աշխ., էջ 430։

58 Նոր Հաճըն, 1961, № 2, էջ 38։

59 Նույն տեղում, էջ 39։

խոստումին ոչ միայն մեզ արդարություն չըլլար, այլև, նույնիսկ դաշնակից-րանակներու ներկայության հայ ժողովուրդը կշարժվի անխնա»⁶⁰։

Հուլիսի սկզբներին քաղաքի ամբարները դատարկվելու պատճառով, ռազմանյութի «սովին» ավելացավ պարենայինը և ամեն օր փողոցներից հավաքում էին հատկապես տարեց մարդկանց կմախքացած մարմինները։

Ամբողջ ամռան ընթացքում քաղաքի հերոսական պաշտպանները ոչ միայն դիմագրավում էին թուրքական հարձակումները, այլև կատարում ռազմական համարձակ ձեռնարկումներ։ Օգոստոսի 5-ի երեկոյան, քաղաքի պաշտպանները անակնկալ կրակոցներով թուրքական ուժերի ուղադրությունը կենտրոնացրին իրենց վրա։ Գրեթե միաժամանակ հակառակորդի թիկունքից տեղացած արագ հարվածները խուճապ առաջացրին նրա շարքերում։ Մինչ բեմակականների ուժերը սարսափած գոռում էին «Հաճըն լլարա իմդա՛դ եթիշ-տի, քա՛լըն (Հաճընցիներուն օգնական ուժ եկավ, փախեք)»⁶¹, հայ մարտիկները գրավում են քաղաքի վրա իշխող Տոնուզ-Սեքի բարձունքի վրա դրված թնդանոթը, ինչպես նաև Հաճըն տեղափոխում թշնամու վրաններում թողած զինամթերքի ու պարենի մեծ պաշարները։ Գիշերային «հակահարձակման ժամանակ հայ մարտիկները գրավեցին նաև քաղաքի վրա տիրապետող դիրքում գտնվող զորանոցը»⁶²։ Հաճընի ճակատամարտերի անհայտ մասնակիցներից մեկի օրագրի գրառումներում գրված է. «Մեծ հարձակում, թնդանոթ տասնոց (10 մմանոց—Հ. Ղ.), մեկ միթրալյոզ (գնդացի—Հ. Ղ.), 85.000 փամփուշտ, 450 թնդանոթի ռումբ, 5 սնդուկ վե—թե (ձեռնառումբ—Հ. Ղ.), 150 հրացան ու բավական պարեն առինք»⁶³։ Հակառակորդի նահանջից հետո նրա թողած մեծ քանակությամբ ավարը հաջողությամբ քաղաք տեղափոխելով, «ժողովուրդը խուճեց թնդանոթին վայրը և զայն առք-փառք գետափին մեծ պողոտա հանեց ու երգելով ու պարելով փոխադրեց Ս. Աստվածածնա եկեղեցվո հրապարակը»⁶⁴։ Հաղթանակի ցնծությունների հետ միաժամանակ լավեցին թշնամու նահանջող ուժերի վրա արձակվող ռումբերի որոտները։

Ռազմաճակատի գծում «թշնամին որևէ շարժում չըրավ 8—10 օր, հակառակ անոր որ պաշարման գիծը չափազանց նեղցած էր քաղաքին ամեն կողմը»⁶⁵։

Օգոստոսի 5-ի հաղթանակից հետո քաղաքում տեղաշարժերն ավելի հեշտացան, հաճընցիները, իրենց ֆիզիկական գոյությունը երկարաձգելու և արտաքին օժանդակություն ստանալու հույսով թափվեցին շրջակա այգիներն ու բանջարանոցները, «պատահ մը չոր հացի տեղ ստիպված ըլլալով փնտրել կանաչեղեններ, թուփեր, վայրի խոտեր քաղել ու խաշել, նույնիսկ հազվադեպ ու կատուններ որսալու»։ Ժիւրն ու էջերը շատոնց մարսված էին»⁶⁶։

Թուրքական զորքերի հրամանատար Կոզան օղլու Դոդան բեյը նոր համարումների կարիք էր զգում, ուստի ժամանակավորապես դադարեցրեց հարձակողական գործողությունները։ Հաճընը նոր մարտերի էր պատրաստվում։ Վեց ամիս տևող պաշարումը, սահմանափակ պարենով ու ռազմամթերքով, միայնակ, անօգնական ու մեկուսացած Հաճընի դրությունն ավելի ողբերգական դարձավ, երբ «երկրամասի շերքեզները, որոնք մինչ այդ չեզոք գիրք էին գրավում, միացան թուրքերին, իսկ պաշարվածների բազմաթիվ կոչերին ֆրանսիացիները ոչ միայն անտարբեր մնացին, այլև տարբեր պատրեր—

60 Ս. Թեբրեզյան, նշվ. աշխ., էջ 263։

61 Նույն տեղում, էջ 443։

62 Մ. Պաղթիւօղլու, նշվ. աշխ., էջ 118։

63 ՏԿՍ Մ. Սեպուհյան, Հաճընի ողբերգությունը (պաշարում և կոտորած), Հալեպ, 1960, էջ 156—157։

64 Ս. Թեբրեզյան, նշվ. աշխ., էջ 446։

65 Զ. Պ. Պողոսյան, նշվ. աշխ., էջ 665։

66 Ս. Թեբրեզյան, նշվ. աշխ., էջ 290։

վականներով Ադանայի հայ կամավորական միավորումներին խանգարեցին օգնության հասնելու գործում»⁶⁷։

Քեմալական հորդանները սեպտեմբերի վերջերին կրակը կենտրոնացրին Հաճընի մերձակա Ռումլու և Գյուզելիմ հայաբնակ գյուղերի վրա, հույս ունենալով թեթևացնել օգոստոսի պարտության տպավորությունը։ Սակայն այստեղ ևս նրանց պարտություն էր սպասում։ Վերևում մեր հիշատակած անհայտ մարտիկի օրագրում կարդում ենք նույն ժլատ տողերը. «Սեպտեմբեր. 21. Ռումլուն գրավեցինք հարձակումով»⁶⁸։

Այնուամենայնիվ, այդ հաղթանակներն ավելի շատ կլինեին, եթե արտաքին օգնությունը վերջապես հասցվեր քաղաքի հերոս պաշտպաններին, որոնք առանց խուճապի մատնվելու դիմագրավում էին ոչ միայն թուրքերի հարձակումները, այլև օրեցօր ավերածություններ գործող սովը։

Հոկտեմբերը սկսվեց հակառակորդի հրանոթների կենտրոնացված կրակով։ Նույն ամսվա 3-ին հատուկ սուրհանդակի միջոցով Ռեքնապաշտպանության բարձր ժաշովը՝ Ադանայում գտնվող Հայ ազգային միության ատենապետ Մ. Տամատյանին ուղարկում է վերջին նամակը, որտեղ ասված է. «Յոթ ամիսներ է վեր գիշեր-ցերեկ մեկ մարդու նման կկռվինք մեզմե շատ զորավոր թուրքին դեմ։ Անոնց էն մեծ ապավինածնին (թնդանոթը—Շ. Ղ.) երկու ամիս առաջ ձեռք անցուցինք։ Ձեր ըսածին համաձայն այդ կողմն գալիք օգնության կսպասենք։ Աչքերնիս ճամփանիդ մնաց և այդ հույսով շատ մը պատեհություններ փախցուցինք և այսօր անոթի մնացինք։ Մինչ այսօր կռվի ընթացքին երկու հարյուր հրացանակիր կորսնցուցինք, մնացալը՝ եթե այսպես երթա, անոթութենե պիտի կորսնցնենք»⁶⁹։ Այս տխուր նամակից հետո Ադանայում նստած ֆրանսիական ռազմական ղեկավարությունը, Մ. Տամատյանը և «ազգային» մարմինները, մինչ այդ կրկնվող «շուտով կհասնինք», «մոտ օրերս կազատվիք», «կռիվը շարունակեցեք» և այլ հուսադրիչ կոչերից հետո, առմիշտ լռեցին։ Անհայտ մարտիկը այդ օրհասական մղձավանջի մասին իր օրագրում գրում է. «Սուրհանդակ ղրկեցինք ճգնաժամի մեջ օգնության համար, քանզի պարեն, էջ, ձի, շուն, կատու, մուկ չի մնաց. ծառի տերև ուտելով...»⁷⁰։

Մահվան օղակը ավելի ու ավելի սեղմեց քաղաքի շուրջ։ Հաստատվեցին հետախույզների հաղորդումներն այն մասին, որ հակառակորդը բազմահզար զորք ու հրետանիով շրջապատել է քաղաքը։ 1920 թ. հոկտեմբերի 14-ի ամբողջ գիշերը 105 մմանոց թշնամական թնդանոթները ցնցում էին քաղաքը։ Անընդմեջ ռմբակոծությունից հետո 16 հազար քեմալականներ ճեղքեցին պաշտպանական գոտին և ներխուժեցին Հաճըն, իսկ «աղիողորմ ճիչերով խեղճ ժողովուրդը տրտմասարսուռ նուպաներու տակ սմբած՝ մահվան ու խուչելության վայրկյանը կհամրեն՝ վերջին աղոթքը մրմնջալով»⁷¹, և քաղաքի լավագույն զավակները հերոսաբար ընկան իրենց դիրքերում։

Արհավիրք, մահ և ավերվածություն տիրեց ամբողջ քաղաքում։ Մոլեռանդ թուրքերի, քրդերի և չերքեզների հորդանները «ալլա՛հ, ալլա՛հ» ոռնալով հրդեհում էին քաղաքի տները, դպրոցական շենքերը, եկեղեցիները և այլ հաստատությունները։ Քաղաքի տարբեր թաղամասերում նորածին ռեբխաններ խանձարուրներու մեջ փաթթված գետինները նետված էին. այդ մարդիկ իրենց ընտանիքը կարգի շարած մեկ կապարով կգնդակահարեին՝ թշնամիին ձեռքը չիչնալու համար, կիներ, երեխաներ կաղոթեին և կպոռային աստուծոմ օգնություն հայցելով»⁷²։

67 Մ. Պ ա ղ ծ ի լ օ ղ լ ու, նշվ. աշխ., էջ 118։

68 Մ. Ս ե պ ու հ, նշվ. աշխ., էջ 157։

69 Ս. Թ ե Ր Վ յ ա ն, նշվ. աշխ., էջ 490։

70 Մ. Ս ե պ ու հ, նշվ. աշխ., էջ 157։

71 Ս. Թ ե Ր Վ յ ա ն, նշվ. աշխ., էջ 504։

72 Նույն տեղում, էջ 513։

Հերոսական Հաճընն ընկավ, քանզի «Ֆրանսիայի իմպերիալիստական շրջանների և նրանց ծրագրերն իրականացնող զինվորականության խարդախ, հայերի համար աղետարեն քաղաքականությունը մի կողմից, և կիլիկիահայության բախտի տնօրինումը ստանձնած հայ մի քանի ղեկավարների անհեռատես քալիերը մյուս կողմից, հնարավորություն ընձեռեցին Անկարայի ղեկավար շրջաններին շարունակելու երկիրը հայերից մաքրելու թուրքական ավանդական քաղաքականությունը»⁷³:

Թուրք բարբարոսները Հաճընը հրդեհելուց հետո ոչնչացրին նրա բնակչությանը: Վեց հազար հաճընցիներից միտն շորս հարյուրի չափ մարդիկ՝ զինված կամ անզեն, կարողացան դուրս գալ մահվան օղակից: Հաճընի զավակների աննկուն դիմադրական ոգին ու սխրագործությունները հայ ժողովրդի ազատագրական պայքարի պատմության փառավոր էջեր դարձան և անգնահատելի ժառանգություն՝ հետագա սերունդների համար:

ГЕРОИЧЕСКАЯ БИТВА АДЖЫНА

А. Е. КАЗАРОСЯН

Р е з ю м е

С 15 марта по 15 октября 1920 г. армяне киликийского города Аджины сражались против кемалистских войск и банд. Осажденный город с 6000-ым армянским населением превратился в военный лагерь и под руководством совета самообороны 8 месяцев вел бои, несмотря на то, что Франция не выполнила своих обещаний в оказании помощи армянам. В результате отсутствия последней, голода, численного и военного превосходства противника аджынцы прекратили оборонительные бои. Лишь 400 армянам удалось вырваться из колыца смерти. Непреклонный дух сопротивления и подвиг сынов Аджины вписались славной страницей в историю освободительной борьбы армянского народа.

THE HEROIC BATTLE OF HADJIN

H. E. GHAZAROSIAN

S u m m a r y

From 15 of March till 15 of October, 1920 Armenians of Cilician city Hadjin fought against Kemalist army and gangs. The besieged city, with 6000 Armenian population, turned into a military camp and under the guidance of the self-defence council carried on the struggle for 8 months, notwithstanding, that France didn't fulfil his promise to help Armenians. In consequence of the absence of the latter, hunger, numerical and military superiority of the enemy, people of Hadjin ceased their defensive fights. Only 400 Armenians could break away from the circle of death. Uncompromising spirit of resistance and feat of sons of Hadjin entered, as glorious pages, the history of emancipatory struggle of Armenian people.

⁷³ Տե. Գ. Ս ա հ ա կ յ ա ն, նշվ. աշխ., էջ 177: